

# Powšitkowne WOZJEWJENJA

njedźelu, 9. februara 2014

## Hłowna zhromadźizna TCM

PPředsydstwo Towarstwa Cyrila a Metoda z.t. (TCM) přeprošuje wšitkich člonow towarstwa, člonow sekcijow a korporacijow kaž tež zajimowanych hosći na swoju hłownu wólbnu zhromadźiznu pjatk, 14. februara, do Ralbic. Započnjemy w 19.00 hodž. z Božej mšu w cyrkwi. Přizamknje so zhromadźizna na „Radlubinje“.

1. zahajenje
2. wólba nawody zhromadźizny
3. rozprawy předsydstwa, nawodow korporacijow a sekcijow
4. financna rozprawa
5. rozprawa rewizijneje komisije
6. diskusija a schwalenje rozprawow
7. wudospołnjenje wustawkow (přewzaće zakładneho porjada cyrkwinskeje služby we wobłuku cyrkwinskih džělowych poměrow)
8. diskusija
9. zakónčenje / modlitwa

*Jurij Špitank, předsyda TCM*

## Zhromadny dzeń za 1. a 2. lětnik

Pod hesłom „Pój, wjesel so!“ přeprošuje dekanatne dušepastyrstwo srjedu, 26. februara, wot 9.00 do 15.00 hodž. džěci 1. a 2. lětnika na zhromadny dzeń w prózdninach do Don Boskowneho domu we Worklecach. Zajimcy njech so prošu hač do pjatka, 21. februara, pod telefonowym čisłom (03 57 96) 8 87 07 přizjewja. Za wudawki dnja zběra so wot kóždeho wobdžělnika přinošk we wysokosci třoch eurow.

## Wudobywanju kaolina pola Różanta so spřećiwjeć

Składnostnje posedženja peticiskeho wuběrka Sakskeho krajneho sejma nastupajo móžne wudobywanje kaolina blisko hnadowneho městna su młode swójby z Różanta namołwili, demonstraciju přewjesć. Zetkać měli so wšitcy, kotřiž to podpěruja, štwórtk, 20. februara, w 9.30 hodž. na parkowanišću při hnadownej cyrkwi. Dokelž je to za čas prózdnin, móže so wosebje wjele młodych ludži na tym wobdžělic. Přihotowane móža měć wšitcy transparenty, na kotrychž swoju wolu zwuraznjeja, zo su přećiwu tomu, blisko hnadowneho městna Różanta kaolin wudobywać ze wšěmi z tym zwisowacymi scěhami, ale zo chcedža swoje putniske městno z cyłym jeho ambientom zachować. Čim wjace ludži – a to ze wšěch generacijow – so na protestnej akciji wobdžěli, čim skutkowniša tuta budže. Towarstwo Cyrila a Metoda z.t. kaž tež towarstwo „Naša Knjeni na Lipje“, kotrež je peticiju z něšto wjace hač 4.500 podpismami krajnemu sejmej přepodało, akciju podpěrujetej.

## Dalekubłanje w medijowym džěle

„Wěru wobswědčeć w džensnišim swěće. Nowinarske a zjawnostne džělo za cyrkej“ rěka hesło lětušeho medijowneho dnja Drježdžansko-Mišnjanskeho biskopstwa. Tutón wotměje so sobotu, 22. měrca, wot 10 do 15.30 hodž. w Drježdžanach. Dupołdnja je wopyt rozhłosowneho domu scelaka MDR předwidžany. Popołdnu wotměja so wšelake workshopy za medijowe a zjawnostne džělo w Benowym gymnaziju. Zarjadowanje přewjedže so za duchownych a lajkow Drježdžansko-Mišnjanskeho biskopstwa kaž tež za sobudžělaćerjow zwjazka Carity. Zajimcy njech so přizjewja z mailku hač do pjatka, 14. měrca, w nowinarskim běrowje biskopstwa w Drježdžanach, [presse@bistum-dresden-meissen.de](mailto:presse@bistum-dresden-meissen.de).